

Na osnovu člana 71. i 106. Statuta Socijaldemokratske partije Bosne i Hercegovine, Glavni odbor, na svojoj sjednici održanoj dana 01.02.2020.godine donio je

ETIČKI KODEKS SOCIJALDEMOKRATSKE PARTIJE BOSNE I HERCEGOVINE

I – UVODNE NAPOMENE

Član 1.

Sadržaj ovog kodeksa utvrđuje okvir etičkih principa ponašanja za članove Socijaldemokratske partije Bosne i Hercegovine (u dalje tekstu: SDP BiH) prilagođene postojećem zakonodavstvu, Statutu SDP BiH, općim aktima SDP BiH i drugim aktima koje donose ovlašteni organi SDP BiH.

Član 2.

Etičkim kodeksom SDP BiH (u daljem tekstu: Kodeks) uređuje se ponašanje članova SDP BiH u međusobnim odnosima i unutarljivoj komunikaciji, kao i ponašanje članova SDP BiH prema građanima i široj javnosti u okviru vanjske komunikacije, u skladu sa pravima i obavezama članova SDP BiH koje utvrđuje Statut SDP BiH.

Cilj ovog Kodeksa je da se njegovom dosljednom primjenom uspostavi primjeren nivo kulture u ponašanju u unutarljivoj i vanjskoj komunikaciji članova SDP BiH pri obavljanju njihovih dužnosti propisanih Statutom SDP BiH, što će odražavati i snažiti međusobno povjerenje članova jednih prema drugima, kao i osnaživati povjerenje građana u moralne osobine, čestitost i poštenje članova SDP BiH.

Član 3.

Ovaj kodeks, također će utvrditi sistem ponašanja članova SDP BiH izabраних u zakonodavne ili izvršne organe vlasti, u stalna i povremena radna tijela u organima vlasti, kao i članova SDP BiH na rukovodnim i drugim izvršnim mjestima u državnim javnim ustanovama, preduzećima i agencijama.

II – PRIMJENA KODEKSA NA ČLANOVE SDP BiH

Član 4.

Kodeks se odnosi na sve članove SDP BiH bez razlike koju ulogu ili funkciju imaju u organima SDP BiH, a kojima je mandat povjeren putem neposrednih ili posrednih izbora.

Član 5.

Članovi SDP BiH dužni su svoje obaveze obavljati u skladu sa Statutom SDP BiH i općim aktima u zavisnosti kojem obliku organiziranja pripadaju ili koju funkciju vrše u organima SDP BiH. U obavljanju pomenutih obaveza, članovi SDP BiH moraju iskazivati maksimalan stepen kolegijalnosti, korektnosti, strpljenja, međusobne tolerancije, pomaganja i međusobnog poštivanja, ostvarujući komunikaciju prilagođenu najvišim moralnim načelima.

Član 6.

Članovi SDP BiH obavljaće svoje partijske funkcije savjesno i odgovorno, uz naglašenu otvorenost i spremnost da odgovaraju za svoje odluke, djelovanja i ponašanja.

U obavljanju svojih funkcija, članovi SDP BiH će poštovati i uvažavati prava i ovlaštenja svih drugih članova, te neće podsticati niti pomagati drugim članovima SDP BiH ili drugim licima koji nisu članovi, da prilikom vršenja svojih dužnosti krše principe uspostavljene ovim Kodeksom. Svako kršenje kodeksa iz ovog člana je kažnjivo.

U obavljanju partijskih funkcija član SDP BiH dužan je čuvati osobni ugled, ugled SDP BiH i povjerenje građana i članova u SDP BiH.

Član 7

Članovi SDP BiH ne smiju vršiti nikakvo samoorganiziranje ili imati samostalno djelovanje, koje za cilj ima destabiliziranje ili stvaranje teškoća organima SDP BiH u vršenju njihovih obaveza utvrđenih Statutom SDP BiH, niti će svojom aktivnošću na bilo koji način nanositi štetu drugom članu ili članovima SDP BiH bez obzira na stepen političkog odnosno kolegijalnog slaganja ili neslaganja sa njima. Svako takvo ponašanje kažnjivo je uskladu sa ovim kodeksom.

Kažnjivo je, također, svako manipuliranje prebivalištem ili mjestom boravka od strane člana SDP BiH, koje ima za cilj da član ostvari članstvo u organima općinskih, kantonalnih, regionalnih ili gradskih organizacija u sredinama gdje ne živi, koje su dužne da takve članove ne biraju u svoje organe što je u suprotnosti sa Statutom SDP BiH. Takvim članovima koji manipuliraju mjestom prebivališta ili boravišta radi ostvarivanja vlastitih ciljeva biće izrečena kazna.

III – PRIMJENA KODEKSA NA IZABRANE ZVANIČNIKE SDP BiH

Član 8.

U obavljanju svojih funkcija, izabrani zvaničnici SDP BiH iz člana 3. ovog kodeksa, imaju obavezu služiti općem interesu, a ne isključivo svom ličnom interesu ili privatnom interesu pojedinaca ili grupa pojedinaca, sa ciljem postizanja direktne ili indirektno lične koristi, zatim zalagaće se za zaštitu ljudskih prava i temeljnih sloboda, uz punu ravnopravnost svih naroda i građana.

Isto tako, izabrani zvaničnici SDP BiH iz člana 3. ovoga kodeksa, dužni su provoditi Program SDP BiH kao i programe različitih oblika organiziranja unutar SDP BiH, koji su ponuđeni građanima radi zadobijanja njihovog povjerenja, uz puno poštivanje svih važećih zakona, podzakonskih akata, Statuta SDP BiH i općih akata SDP BiH koji su na snazi.

Član 9.

Kada član SDP BiH ima direktan ili indirektan lični interes u materiji koju razmatraju zakonodavni ili izvršni organi vlasti na bilo kojem nivou u koje su izabrani ili ako su izabrani u javne ustanove, preduzeća ili agencije, oni će objaviti te interese prije vijećanja ili glasanja. Izabrani zvaničnici će se uzdržati od bilo kakve izjave ili glasanja u organima SDP BiH o pitanjima u vezi s kojima imaju neposredan ili posredan lični interes.

U slučaju izbjegavanja obaveza iz stava 1. ovoga člana, primjenom ovoga kodeksa članu SDP BiH može biti izrečena odgovarajuća kazna.

Član 10.

Izabrani zvaničnici iz reda SDP BiH nemaju pravo na bilo koju vrstu pregovora sa drugim političkim strankama i njihovim predstavnicima bez ovlaštenja nadležnog organa SDP BiH. Neovlašteno vršenje pregovora sa drugim političkim strankama i njihovim predstavnicima kažnjivo je u skladu sa ovim kodeksom.

Član 11.

Svaki izabrani zvaničnik iz reda SDP BiH dužan je provoditi političke stavove koje utvrđuje nadležni partijski organ, te s tim u vezi artikulirati svoju eventualnu diskusiju prilikom zasjedanja organa vlasti, te u svakom slučaju glasati u skladu sa ranije utvrđenim partijskim stavom. Oglušivanje na ovakav vid djelovanja, koje za cilj ima samostalno odlučivanje izabranoga zvaničnika iz reda SDP BiH, odnosno glasanje mimo partijskih stavova kažnjivo je u skladu sa ovim kodeksom.

Član 12.

Izabrani zvaničnici iz reda SDP BiH iz člana 3 ovog kodeksa, povinovaće se svim važećim propisima koji ograničavaju istovremeno obavljanje dvije ili više političkih funkcija. Izabrani zvaničnici neće obavljati druge političke funkcije koje bi ih ometale u obavljanju njihovih funkcija kao izabranih zvaničnika. Oni neće obavljati funkcije, imati izabrane mandate, zanimanja ili službene dužnosti koje obuhvataju nadzor nad njihovim sopstvenim dužnostima kao izabranih zvaničnika ili putem kojih oni sami sebi daju obavezu da sebe nadziru u svojstvu izabranih zvaničnika.

Član 13.

U pitanjima koja nisu obuhvaćena Programom SDP BiH i utvrđenim stavovima organa, izabrani zvaničnik će u obavljanju diskrecionih nadležnosti, dakle u djelovanju prema ličnom nahodanju, za svaki svoj prijedlog, davati iscrpno obrazloženje nadležnim organima SDP BiH kojima kao član pripada, uz navođenje svih činjenica na kojima je takav prijedlog zasnovan, posebno koja pravila i propisi su primijenjeni, uz ukazivanje na to kako takav prijedloga udovoljava tim pravilima i propisima. U nedostatku relevantnih pravila i propisa, član SDP BiH će prije podnošenja prijedloga, uz odgovarajuće obrazloženje, zatražiti politički stav nadležnog organa SDP BiH u zavisnosti na kojem nivou vlasti obnaša svoju funkciju.

Član 14.

Izabrani zvaničnici iz reda SDP BiH će se u obavljanju svojih funkcija uzdržati od bilo kakvog ponašanja koje bi po važećem zakonodavstvu, moglo da se okarakterizira kao aktivno ili pasivno podmićivanje.

Član 15.

Izabrani zvaničnici iz reda SDP BiH će se pridržavati budžetske i finansijske discipline koja obezbeđuje ispravno upravljanje javnim prihodima, na način reguliran važećim zakonodavstvom. U obavljanju svojih dužnosti, izabrani zvaničnici neće učiniti ništa čime bi pronevjerili budžetska sredstva ili donacije.

Član 16.

Prilikom obavljanja svojih funkcija izabrani zvaničnici neće poduzimati mjere kojima bi sebi pribavili lične i profesionalne koristi u budućnosti, odnosno po prestanku obavljanja funkcije.

IV - ODNOSI SA JAVNOŠĆU

Član 17.

Odnosi sa javnošću ostvaruju se na sljedeći način:

- Posebno organizirane press konferencije
- Davanje izjava pisanim i elektronskim medijima
- Posebno sačinjena saopštenja
- Web portal SDP BiH
- Organiziranje skupova na kojima se prenose politički stavovi SDP BiH

Učešće u odnosima sa javnosti imaju pravo članovi SDP BiH koji imaju ovlaštenje nadležnog partijskog organa koje može biti trajnog ili privremenog karaktera. Članovi SDP BiH koji nemaju ovlaštenje nadležnog partijskog organa, bilo kojeg nivoa, nemaju pravo u ime SDP BiH uzeti učešće u odnosima sa javnošću.

U javnim nastupima u kojima ne predstavlja SDP BiH, a koji se na bilo koji način odnose na poslove, članstvo i aktivnosti iz djelokruga SDP BiH član SDP BiH ne smije iznositi podatke koji bi mogli naštetiti ugledu SDP BiH i narušiti povjerenje građana i članstva u rad organa SDP BiH.

U javnim nastupima u kojima ne predstavlja SDP BiH i koji nisu tematski povezani sa SDP BiH, član ne treba odobrenje partijskog organa za nastupe u medijima, ali je pri tome dužan paziti na ugled SDP BiH i osobni ugled.

Član ne smije koristiti u nedozvoljene svrhe informacije o djelovanju i radu organa SDP BiH kojih je član, odnosno odavati podatke koje je saznao za vrijeme obavljanja svojih funkcija.

Član 18.

Osim pomenutih načina iz člana 17. ovoga kodeksa, dio učešća u odnosima sa javnošću može se ostvariti putem društvenih mreža , različitih individualnih blogova ili internet stranica. Svaki član SDP BiH ima pravo na ovaj

vid ostvarivanja komunikacije sa najširoom javnosti. Iznošenje stručnih stavova iz naučne oblasti pojedinog člana je dozvoljeno.

Član 19.

Korištenje društvenih mreža, posebnih blogova ili internet stranica može sadržavati lične stavove člana SDP BiH koji nisu političkog karaktera, a odnose se na različite aspekte društvenog, naučnog, kulturnog ili sportskog života. U slučaju da se prilikom korištenja društvenih mreža iznose politički stavovi, oni moraju biti usklađeni sa Statuom SDP BiH, Programom SDP BiH, ranije utvrđenim političkim stavova partijskih organa na bilo kojem nivou organiziranja. U slučaju da se društvene mreže koriste za iznošenje političkih stavova koji odudaraju ili nisu u skladu sa politikama SDP BiH, tada se tom članu mogu izreći kaznene mjere.

Prilikom korištenja društvenih mreža, ličnih blogova ili internet stranica svaki član SDP BiH obavezan je izbjeći bilo koji vid vrijeđanja, omalovažavanja ili diskreditacije bilo kojeg drugog člana SDP BiH ili partijskog organa, te posebno pažnju posvetiti zaštiti ugleda SDP BiH. Ako se takva aktivnost pojavi, tada se mogu izreći odgovarajuće kazne.

V - PRAVILA KOJA VLADAJU U IZBORNOJ KAMPANJI NA LOKALNIM, OPĆIM ILI UNUTARPARTIJSKIM IZBORIMA

Član 20.

Izborna kampanja može se odnositi na lokalne ili opće izbore, koji se organiziraju u skladu sa Izbornim zakonom Bosne i Hercegovine, kao i na unutarpartijske izbore SDP BiH koje raspisuje nadležni partijski organ.

Prilikom odvijanja izborne kampanje za lokalne ili opće izbore, svaki član SDP BiH dužan je uzeti aktivno ili pasivno učešće u izbornoj kampanji. Tokom tog učešća u izbornoj kampanji, strogo je zabranjeno vrijeđanje, omalovažavanje ili diskreditacija bilo kojeg kandidata iz reda SDP BiH koji učestvuje na lokalnim ili općim izborima. Strogo je zabranjen rad, u kojem kandidati na kandidacijskim listama za lokalne ili opće izbore, otvoreno ili tajno rade protiv drugih kandidata SDP BiH sa kandidacijski lista, kako bi time sebi pribavili dovoljno glasova da budu izabrani u zakonodavne organe vlasti. Takva aktivnost biće predmetom kažnjavanja.

Isto tako, prilikom izborne kampanje za unutarpartijske SDP-ove izbore, kandidati čija je kandidatura ovjerena nemaju pravo koristiti elemente vrijeđanja, omalovažavanja ili diskreditacije drugih protivkandidata, niti bilo kojeg drugog člana SDP BiH.

VI – SUD ČASTI

Član 21.

Sud časti SDP BiH je neovisno radno tijelo koje daje mišljenja o sadržaju i načinu primjene Etičkog kodeksa te promiče etička načela i standarde u SDP BiH.

Sud časti SDP BiH imenuje se od strane Glavnog odbora SDP BiH, koji svojom posebnom odlukom uređuje način rada Suda časti.

Sud časti sastoji se od istaknutih i dokazanih članova SDP BiH, koji su svojim radom dali značajan doprinos afirmaciji društvenih i moralnih vrijednosti, te se njegov sastav i broj članova utvrđuje odlukom Glavnog odbora SDP BiH.

Član 22.

Sud časti je neovisan u odlučivanju.

Način rada, postupanja i glasanja, Sud časti utvrđuje poslovnikom o radu.

Sud časti prati primjenu Etičkog kodeksa SDP BiH, promiče etičko ponašanje u međusobnim odnosima članova te odnosima članova prema građanima, zaprima pritužbe na neetičko ponašanje i postupanje članova, provodi postupak ispitivanja osnovanosti pritužbe, te vodi evidenciju o zaprimljenim pritužbama.

Član 23.

Sud časti obavlja sljedeće poslove:

- odgovara na prijave organa podnesene zbog toga što u roku od 30 dana od zaprimanja pritužbe nisu dobili odgovor na pritužbu ili u slučaju kada podnositelj pritužbe nije zadovoljan odgovorom,
- provodi postupak ispitivanja osnovanosti pritužbe na ponašanje članova SDP BiH
- daje odgovor na pritužbu podnositelju pritužbe,
- daje mišljenja vezana uz sadržaj i primjenu Etičkog kodeksa,
- prati primjenu propisa na području etičkog postupanja članova SDP BiH te predlaže njihove izmjene i dopune,
- promiče etičke standarde u SDP BiH.

Član 24.

Podnošenje apelacija Sudu časti SDP BiH za djelovanje ili aktivnost člana ili članova SDP BiH koje nije u skladu sa ovim kodeksom imaju pravo svi organi SDP BiH na bilo kojem nivou organiziranja. Apelacija mora sadržavati tačne elemente povrede ovog kodeksa sa dokumentiranim dokazima o takvom djelovanju pojedinog člana ili članova SDP BiH za koje se traži provođenje postupka.

Sud časti provodi postupak ispitivanja osnovanosti pritužbe te priprema izvještaj o provedenom postupku.

Sud časti dužan je u roku od 30 dana od dana primitka pritužbe provesti postupak ispitivanja osnovanosti pritužbe te pripremiti odgovor podnositelju pritužbe.

Član 25.

U postupku ispitivanja osnovanosti pritužbe, Sud časti zatražit će pisanu izjavu člana na kojeg se odnosi pritužba, izjave drugih osoba koje imaju neposredna saznanja o sadržaju pritužbe, te poduzeti i druge radnje potrebne za utvrđenje činjeničnog stanja, uključujući i saslušanje članova.

Član 26.

U slučaju dvojbe o tome predstavlja li neko ponašanje člana SDP BiH povredu Etičkog kodeksa, Sud časti zatražit će mišljenje Statutarnog odbora.

VII - KAZNENE ODREDBE

Član 27.

U skladu sa Statutom SDP BiH, Sud časti može predložiti organima SDP BiH da izreknu sljedeće kaznene mjere:

- opomena
- opomena pred isključenje
- suspenzija
- isključenje

Član 28.

Opomena se izriče članu koji je učinio lakše povrede iz članova 5, 6. i 17. ovog kodeksa, što utvrđuje Sud časti SDP BiH i predlaže Predsjedništvu SDP BiH izricanje takve mjere.

Opomena pred isključenje izriče se za teže povrede iz članova 7, 8, 9, 10, 19. i 20. ovoga kodeksa, što utvrđuje Sud časti SDP BiH i predlaže nadležnom organu SDP BiH izricanje takve mjere.

Suspenzija se izriče članu za kršenje članova 11, 12, 13, 14, 15. i 16. ovoga kodeksa, o čemu prijedlog utvrđuje Sud časti SDP BiH sa prijedlogom trajanja i vrste suspenzije (suspenzije od kandidiranja za partijske organe ili suspenzije od kandidiranja za lokalne ili opće izbore), što upućuje nadležnom organu SDP BiH na konačno odlučivanje.

Isključenje se izriče članu SDP BiH koji je počinio težu povredu ovoga kodeksa, odnosno Statuta SDP BiH, što utvrđuje Sud časti SDP BiH i upućuje nadležnom organu SDP BiH na konačno odlučivanje.

Za ponovljeno djelo iz stavova 1, 2 i 3. ovoga člana može se izreći i teža kazna o čemu prijedlog utvrđuje Sud časti SDP BiH i dostavlja ga **SDP BiH na konačno odlučivanje.**

Član 29.

Član SDP BiH kojem je izrečena bilo koja od pomenutih kazni, koju je utvrdio nadležni organ SDP BiH na prijedlog Suda časti SDP BiH, ima pravo na iskazivanje žalbe Statutarnom odboru SDP BiH u roku od 30 dana nakon prijema odluke o kazni. Statutarni odbor SDP BiH će u roku od 60 dana razmotriti žalbu i dostaviti svoj odgovor koji je konačan.

VIII – PRELAZNE I ZAVRŠNE ODREDBE

Član 30.

Ovaj kodeks stupa na snagu narednog dana od dana donošenja na sjednici Glavnog odbora SDP BiH i dostavlja se svim članovima SDP BiH u elektronskoj formi.

Član 31.

U slučaju da Glavni odbor SDP BiH nije formirao Sud časti SDP BiH, predlaganje ovog kodeksa može obaviti Predsjedništvo SDP BiH uz prijedlog sastava Suda časti. Donošenje Etičkog kodeksa i imenovanje Suda časti SDP BiH bi se u tom slučaju obavilo na istoj sjednici Glavnog odbora SDP BiH.

Broj: 02-04-48/20

Sarajevo, 04.02.2020.godine



Predsjednik Glavnog odbora SDP BiH

Saša Magazinović

